

SUHANO

PETRUS

KAHAA PAKUNO

Kaatono Wamba

Suhano Petrus kahaa pakuno ini nopakatue so kosasawindo umati kabhao-bhaono. Patudhuno mpuu suha aini noewangi sabhaha kafoina'u umala nefofoguhu'aondo seemie hodua guru agama bhe noewangi dua podiu modaindo. Petrus nesalo mpuu mie toka marasaeano ne Kristus koemo notiwudhu totono lalondo ne sabhaha kafoina'u medando na'a. Maraluu'ano sadaa-daa damintahaki kafoina'u toka nefosampendo rasulu moha'aono wuntano matano kodadino bhe kafoina'uno Yesus Kristus. Kotu-kotu'u nemosodo'aono lalono Petrus, kafoina'undo mpahaguru-guruno putae Yesus paise nasumuli we dhunia ini (3:3-4). Petrus nofofe'ulai'ao putae oleo kahato'ano Ompu tetewei nahumato, ampamo kaowu Lahata'ala nofosabahaki, nokiido manusia dabinasa, gaono mpuu kosasawindo manusia dametompa'ao dhosando maka dadumoli ne Anoa (3:8-9). Suhano Petrus ini nobhahi pototo'ano bhe suhano Yudas.

Kalengkano suha 1:1-2

1 Suha aini nomai'ao ne Simon Petrus, palima-lima bhe rasuluno Yesus Kristus, so bhahitie'i pototo'ano kaparasaea bhe insaodi. Nepulao'aoku kaparasaeantoomu ne Yesus Kristus, Lahata'alantoomu mosalamati kaita bhe meowano ka'adhili. ²Sio-sio-mo sadhia nama'angkoomu kabarakati bhe katohopono dadi pontalabhi-labhino, hampano kaparasaeamiu ne Lahata'ala bhe ne Yesus Ompuntoomu.

Kabhasi bhe kapilino Lahata'ala 1:3-15

³Lahata'ala nopakemo kuasa Kaseemie-mie'ano, nowa'a kaita sabhaha maraluu'ano so dadumadi lumebe'ao. Kafowa'ao'ano

hampano dopande'aanemoomu Kristus, Anoamo fobhasino so daeala'ao dawu weo kakalabhiano bhe kataano lalono. ⁴Pedamo ana'a Lahata'ala nowa'a kaitaomu sabhaha dhandino koharagaano bhe foliuno kakalabhia. Hampano dhandi ana'a lapamoomu ne sabhaha kapoindalo fodai-daino ne dhunia ini, maka mealaomu dawu weo sifatino Lahata'ala. ⁵Dadi'anomo ulei'e mpuu lalomiu neanomo kaparasaeamiu ne Kristus napotubhahi bhe habu metaa; habu metaa napotubhahi bhe kapande. ⁶O kapande napotubhahi bhe kafewanakino totono lalo; kafewanakino totono lalo napotubhahi bhe kakosabaha dopotaami weo kasabha; kakosabaha dopotaami weo kasabha napotubhahi bhe dadi lumebe. ⁷Kalebeno dadi napotubhahi bhe kanini ne bhahitie'into; kanini ne bhahitie'into napotubhahi bhe kanini kaasi ne kosasawindo mie bhainto. ⁸Ane kosasawi'ae podiu sa'ituini makesie'omu dhulu oleo dhulu kantuhu, tetewei nakuma'ende-ende totono lalomiu kumahadhaa'omu bhe nakohasili metaa, sampe sedhulu'a dua mande'aaneomu Yesus Kristus Ompuntoomu. ⁹Tamaka o mie tapa makesino podiu ana'a tapedamo mie mohawuno mata tawa kabunto, nolimpu'aanemo ingka dhosano endefi'ini padamo dofekanggela'iane.

¹⁰Dadi'anomo bhahitie'iku, ulei'e mpuu lalomiu fotiwohae'omu putae kotu-kotu'u hintimiu itu nobhasikoomu bhe nopilikoomu Lahata'ala. Ane humabuomu nada ana'a, ingka paise mondawuomu weo dhosa tawa sumowoaneomu kaparasaeamiu. ¹¹Nadamo na'a hintimiu daelengkaangkoomu kaangka'a molalesa mesua'omu weo kafopahinta'a suhue dhamani, ingka aitumo kafopahinta'ano Yesus Kristus Ompuntoomu mosalamati kaitamo.

¹²Kanandoo'anomo patudhuku sadhia ame'ulaiangko'e'omu bhahi-bhahi'ae ini, mahingga pande'aanemoomu bhe noma-tangkamo koehemiu weo kabanara toka netahimamiu. ¹³Kaomponano pae'o ahumunsa mbadha kasaraku ini, aabhiemo dua takaku sadhia ame'ulaiangko'e'omu bhahi-bhahi'ae ini. ¹⁴Kapa'amo apande'aane dadiku ini paemo naomponaa, ingka padamo nofohato kanau wutono Yesus Kristus Ompuntoomu. ¹⁵Dadi'anomo a'ulei'e laloku neanomo mahinggamo akundomo, kosasawi'ae na'a sadaa-daa'e me'ulai'eomu.

Petrus nembali sakusiino kakalabhiano Kristus

1:16-21

¹⁶Wakutuuno tafohatoangkoomu kuasano Omputo Yesus Kristus bhe kahato'ano mada kaowu, insaodi miina tamangkafi kapu-kapuna nehabundo manusia, tamaka padamo tawoha'ao wuntano mata mani kakalabhiano. ¹⁷Insaodi tawoha'ao wuntano mata mani Yesus netahima kakalabhia bhe kafosibhala ne Lahata'ala Amano. Wakutuu ana'a notifetingke suahano Foliuno Kakalabhia nokobhoasao ne Anoa ambano, "Anoamo ini anaku timoasi'aono, neposahasi'aono laloku."^a ¹⁸Suaha ana'a tafetingke'ao wuto mani nomai'ao te surugaa wakutuuno tapoowa-owa bhe Anoa te gunu mongkilo.

¹⁹Dadi'anomo sedhulu'a kamatangkanano tafintahaki putae bhoasaono Lahata'ala nekosuaha'aondo ana-anabii daanumo nentoo. Naetaa mpuu umondofaaneomu bhoasao ana'aa, kapa'amo nokotilanga pedamo kantalea we mohohondo'ano. Tilanga aitu ondo-ondoe'omu kansuhu, ampa nahumaha kamentae maka o kowine nakotilanga weo totono lalomiu.^b ²⁰Foliuno kafaraluu so nepande'aomiu: kaowilino Lahata'ala mangka'ano ne ana-anabii tibuhino weo Kitabi, paise naembali dama'anakie ampa kapoindalono wutondo. ²¹Kapa'amo miina nandumandooa kaowilino Lahata'ala nefosampendo ana-anabii nomai'ao ne kapoindalondo manusia, tamaka kuasano Rohino Lahata'ala kumabhintino ana-anabii sampe dokosuaha'ao kaowilino Lahata'ala.

Mpahaana-anabii bhe mpahaguru-guruno

2:1-22

2 Endefi'ini ne olotando umatino Lahata'ala nandoo mie mpahaana-anabiino, nadamo dua aitu ne olotamiu itu nandumandoo mpahaguru-guruno. Andoa daeowa sabhaha kafoina'u tapa banara so mefobinasano manusia, bhahamoa dagumagai'emo Kafeompu'a madano tumolosida. Nadamo ana'a dapiki'awamo kabinasa'ano wutondo. ²Dabhahi mie so mangkafino podiundo nekuasaino sabhaha nafusuu modai. Hampano kafoina'u bhe

^a 1:17 Mat 17:1-5; Mrk 9:2-7; Luk 9:28-35

^b 1:19 O kamentae nepulao'aono oleo kahato'ano Omputo; o kowine ka'ibahatino wutono Kristus.

habundo dabhahi mie so meka'aebuno Kaangka'ano Kabanara, ma'anano kaparasaea ne Kristus. ³Hampano kakadau-daundo mpahaguru-guruno na'a daetula-tulaangkoomu sabhaha paha, patudhuno daeala'ao laba. Tamaka kahukumundo nomponamo dofontaa-ntaa'e, Lahata'ala miina bhe kaodoa, tetewei namobinasada.

⁴Ingka endefi'ini mala'ekati kodhosano miina dalumapaa ne kahukumuno Lahata'ala, tamaka no'ohoda we narakaa. Andoa maitu nofopesuada weo kantie mohohondono, nofekataada ampa nahumato oleo so katibhotusi'ando. ⁵Pedamo dua ana'a we dhamani wawono, mie modai miina dalumapaa ne kahukumuno Lahata'ala. Anoa nofosampu luano oe bhalano ne dhuniando mie modai na'a, maka mpahinomo Nuh bhe mie pipituno poowa'ano sumalamatino. Nuh ini sadhia nofofohato'ao dadi banara.^a ⁶Pedamo dua ana'a ne kotano Sodom bhe Gomora, Lahata'ala nohukumuda nohampunianda efi, somo sandahano so kumadhadhiano ne mie modai. ⁷Wakutuu ana'a ampamo Lot nefosalamati. Anoa ini mie banara, nosabha mpuu handano hampano habundo mie tapa mefadhulino atora bhe dumadino weo nafusuu modai. ⁸Kapa'amo Lot, mie banara maitu, nodadi ne olotando maka se'o-se'oleo nowoha bhe nofetingke diundo, sampe totono lalono nokadee-dee sepali'a.^b ⁹Bhahi-bhahi'ae maitu nofotiwohamo putae Ompu nopande'aane nofosalamati mie banara mai'ao ne sabhaha kasabha bhe nopande'aane dua nohunsu mie modai ampa nahumukumuda nahumato oleo so katibhotusi'ando, ¹⁰mangkenomo andoa mangka-angkafino nafusuu hamesa bhe kapoindalo pokahakuno bhe misakino kuasano Lahata'ala.

Ka'osano kakadondo bhe kalangkeno diundo mie mpahaguru-guruno na'a, sampe dokadomo dua dofeka'aebu dumadino weo kakalabhia te surugaa. ¹¹Gaha'aitumo mahinggamo mala'ekati moliuno ka'osa bhe kuasando mpahaguru-guruno na'a, ingka miina daokadoa dameka'aebu tawa dasumangkati dumadino weo kakalabhia na'a ne wiseno Lahata'ala. ¹²Tamaka mpahaguru-guruno maitu pasa'idamo kadadi tapa kofekihino, tadodadimo so mbadhando, dolente so kaowu dahumakoda bhe dasumumbeleda.

^a 2:5 Kej psl 6-7

^b 2:6-8 Kej psl 19

Andoa dofeka'aebu tapa nelosangindo, sampe habu modaindo maitu somo kabinasa'ando pasadamo kadadi fohumaano. ¹³Kakadee-dee so ne'awando na'a kanggetu dua ponambono habu modaindo fofodee-deeno. Dohabu pokahaku ole-oleo dokonaemo dua kataano namisindo. Ane dohumaa dopombali-mbali bhe hintimiu weo kahamendo umati, diundo notimolampi bhe notimoambano'ao mba'inomo dololanu'ao nafusuu modai. ¹⁴Matando nopono'ao nafusuu kamonsule bhe miina bhe kangaraa dehabu dhosa. Mie monaleno kaparasaea dowudhuda. Totono lalondo dokane-kanea'ane kakadau-dau. Andoa o mie somo nekangkanaino balaano narakaa. ¹⁵Andoa dokolilinomo mba'inomo miina damangkafi kaangka'a melaa'ano, tamaka doangkafimo kaangka'ano Bileam anano Beor endefi'ini. Bileam na'a noasiane sepali'a neala ponambo ne habu modai. ¹⁶Tamaka Bileam ne'awa kafodhaga wakutuuno keledai kasawi'ano tapa mandeno mugauno tamba'omo nokosuaha peda manusia. Pedamo ana'a anabii aitu dofosuhue nahumunsa podiu kakambee-mbeeno maitu.^a

¹⁷Mie mpahaguru-guruno itu pasadamo matano oe mokekele-
no, peda'idamo pakahawu nefololano kawea mo'osa. Lahata'ala tokamo nefontaa-ntaa'anda kaeate'a weo doloma mposo. ¹⁸Andoa defomantale wamba kalangkeno diu pata kofahalaa'ano. Depakesimo dua nafusuu modai defetando mie kane'o lumapano mai'ao ne dadi modai. ¹⁹Mie andoa na'a dodhandianda kabebasi, gaha'aitumo wutondo mpahaguru-guruno maitu nofobhatuada kanea fofobinasano. Ingka dopande'aane ane seemie manusia notalo, nembalimo bhatuano o ae maka dua tumaloe na'a. ²⁰Kapa'amo ane o mie nopande'aomo Ompu bhe Omputo Fosalamatino Yesus Kristus, ingka nolapamo mai'ao ne sabhaha kuasano dhunia pokahakuno. Tamaka ane suli toha dotigogantu bhe dotalo ne sabhaha kuasa na'a, ingka sedhulu'a kadahano bhe endefi'ini. ²¹Mie medando na'a sakotu'uno netaamo paise sepali'a damande'ao kaangka'ano kabanara, bhe damande'aane maka dokukundo pahinta mongkilo nefosampe ne andoa na'a. ²²Podiundo nopokantibha mpuu bhe wambano kapalenda aini "O da'u suli nososo tongkano, o wewi mada mekadiuno nosuli toha nofelembo."^b

^a 2:15-16 Bil psl 22-25

^b 2:22 Ams 26:11

Oleo kahato'ano Ompu
3:1-16

3 Bhahitie'iku timoasi'aono, aini o suhakumo kahaa pakuno. Ne kohaatangke'ae suhaku ini a'u lei'e laloku afe'ulaia-ngkoomu bhahi-bhahi'ae ini so nomoinda'ao fekihimi. ²Gaoku me'ulai'eomu wambano Lahata'ala nekosuaha'aondo wawo ana-anabii mongkilo, bhe me'ulai'eomu dua sabhaha pahintano Ompu bhe Fosalamatino, nefosampendo rasulu'i ne hintimiu. ³Foliuno kafaraluu so nepande'aomiu: nama'o pandano dhamani dahumato mie foele-eleno damele-eleoomu. Andoa dodadi doangkafi kaowu kapoindalono mbadhando. ⁴Andoa dapugau ambado, “Ingka ambado, Ompu nopodhandi namai, kaowua ne amai'emo bhahaa? Kapa'amo awua'intoomu domatemo, maka o dhunia mpini pakatifokonandoono, ta'ampamo aitu ingka sadaa-daa'emo.” ⁵Andoa dofepuu'e dongahe datumandai'e putae we dhamani wawono Lahata'ala tanokobhoasao nonandoomo lani bhe dhunia, o dhunia nomai'ao ne oe bhe bhahi-bhahi'ae ndumandoono dodadi'ao oe. ⁶Pedamo ana'a ingka o oemo dua mobinasano dhunia wawono, nofobinasaane luano oe bhalano.^a ⁷Tamaka hampanomo dua bhoasaono na'a lani bhe dhuniantoomu ampa aitu sadaa-daa nodamba'aane, neanomo mada kaowu namohansuruane efi; nohunsahunsae ampa nahumato tempono so katibhotusi'ando bhe katifobinasa'ando mie modai.

⁸ Ampamo kaowu bhahitie'iku, koise molimpu'aaneomu dua sehondano ini: ne pomatano Lahata'ala se'oleo tanopototomo bhe sehewu ta'u, sehewu ta'u tanopototomo bhe se'oleo. ⁹Ompu miina naepoluntu-luntua namekako'ula dhandino, mahingga nandoo mie kofekihino peda na'a. Tamaka nosabahakikoomu, kapa'amo nokiido bhe so binasano, gaono kosasawindo manusia dametompa'ao dhosando bhe dadumoli ne Anoa. ¹⁰Oleo kahato'ano Ompu tetewei nahumato, nahumato nada kaso'o. Ne oleo ana'a o lani namiinae napoangka huhu timote'i bhe sabhaha ndumandoono te lani nahumampuniane efi. O dhunia bhe kosasawi'ae ndumandoono te wawono naosali. ¹¹Ane kosasawi'ae damobinasae nada na'a, nada amai bhahaa beanoo so dadimiu? Ingka

^a 3:6 Kej psl 7

tabeano naongkilo bhe nalumebe mpuu podiumiu. ¹²Weo dadi medando na'a ntumaa-ntaa'omu oleono kahato'ano Ompu bhe ulei'e lalomiu so napikihato'ao. Ne oleo ana'a o lani naowolo natikantunu, sabhaha ndumandoo'ano te lani name'oe hampano hendeno efi. ¹³Tamaka pedamo dhandino Lahata'ala, intaodionu dentaa-ntaa'omu lani bhe dhunia bu'ou, ne itumo kapoindalono Lahata'ala sadhia damangkafie.

¹⁴Dadi'anomo, bhahitie'iku timoasi'aono, poowa ntaa-ntaa'omu bhahi-bhahi'ae na'a, ulei'e lalomiu dadi mongkiloomu weo potatano Lahata'ala, pae kodengo-dengoomua bhe pometaa'omu bhe Lahata'ala. ¹⁵Kakosabahano Lahata'ala tabeano dakumonae mbali kasalawando manusia so dasumalamati'ao. Paulus, bhahitientoomu timoasi'aono, ingka padamo dua nobuhiangkoe'omu, noangkafi kapande ne'awano. ¹⁶Ne kosasawi'ae suhano, Paulus sadhia dua nobuhi kafoina'u aini. Daanumo nandoo sehonda haa honda mo'ali'ano doma'anakie, sampe dobhansu-bhansulee mie tapa lumosangie bhe monaleno kaparasaea. Pedamo dua ana'a nehabundo ne wamba sigao'ano weo Kitabi. Panda-pandano nae-mbalimo so kabinasa'ando.

Kasongkono suha

3:17-18

¹⁷Tamaka hintimiu, bhahitie'iku timoasi'aono, ingka pande'aane-moomu wawo bhahi-bhahi'ae na'a. Dadi'anomo kodhagaomu koe dobulukoomu weo kalibundo mie kolilinono pata mefadhulino atora, bhahasaa mondawuomu mai'ao ne kafinda'amiu motangka'ano. ¹⁸Naetaa mpuu modhuluomu kabhala bhe kamatangka-miu weo kanini kaasino Yesus Kristus, Ompu bhe Fosalamatino, bhe nasedhulu'a dua mande'aaneomu. Nopantasi mpuu damosibhalae ha'oleo ini ampa suhue dhamani! Amin.